



Aðildarfélög KSÍ  
b.t. formanna/framkvæmdastjóra

Reykjavík, 20. apríl 2021

## Viðmiðanir og sértækar ráðstafanir vegna heimsfaraldurs kórónaveiru (Covid-19)

Ágætu félagar,

Á fundi stjórnar KSÍ 15. apríl sl., samþykkti stjórn nýja reglugerð KSÍ um viðmiðanir og sértækar ráðstafanir vegna heimsfaraldurs kórónaveiru. Reglugerðin er að mestu samhljóða þeirri reglugerð sem var í gildi vegna keppnistímabilsins 2020. Þær breytingar sem gerðar hafa verið á fyrri reglugerð eru eftirfarandi:

Breytingar sem samþykktar hafa verið eru **grænmerktar**.  
Það sem samþykkt hefur verið að falli út er ~~yfirstrikað~~

## REGLUGERÐ KSÍ

### Um viðmiðanir og sértækar ráðstafanir vegna heimsfaraldurs kórónaveiru (Covid-19)

#### 1. gr.

##### *Gildissvið*

- 1.1. Ákvæði reglugerðar þessarar gilda um Íslandsmót og bikarkeppni í meistaraflokki keppnistímabilið **2021** ef grípa þarf til sértækra ráðstafana vegna heimsfaraldursins Covid-19.

#### 2. gr.

##### *Frestun leikja*

- 2.1. Mótanefnd KSÍ skal fresta leik óski félag eftir því þegar eftirfarandi á við:  
Fimm leikmenn eða fleiri í öðru hvoru keppnisliðinu, sem hafa verið í byrjunarliði þess/þeirra í öðrum af síðustu tveimur leikjum liðsins, geta ekki tekið þátt í viðkomandi keppnisleik þar sem þeim hefur verið gert að sæta einangrun eða sóttkví skv. reglum útgefnum af heilbrigðisráðherra, eftir að hafa verið greindir með Covid-19 sjúkdóminn eða orðið útsettir fyrir Covid-19 smiti.
- 2.2. Verði knattspyrnuleikir meistaraflokka bannaðir með reglum útgefnum af heilbrigðisráðherra ~~eða mælist sóttvarnarlæknir til þess að þeir fari ekki fram vegna heimsfaraldurs kórónaveiru~~, skal mótanefnd KSÍ fresta öllum leikjum sem eru á dagskrá á þeim tíma sem bannið ~~eða tilmælin taka~~ tekur til.

#### 3. gr.

##### *Nýir leikdagar frestaðra leikja*

- 3.1. Þegar aðstæður þær sem ákvæði 2. gr. tekur til standa því ekki lengur í vegi að frestaðir leikir geti farið fram, skal mótanefnd KSÍ setja þá á nýja leikdaga innan dagskrár hvers móts. Skal mótanefnd jafnframt heimilt að gera breytingar á niðurröðun leikja sem miða að því að sá tími er líður á milli leikja verði eins rúmur og komið verður við og svo jafn sem verða má. Milli kappleikja hjá sama liði skulu líða minnst tveir heilir dagar, en heimilt er mótanefnd að stytta þennan tíma ef nauðsyn krefur.

#### 4. gr.

##### *Mótslok*

- 4.1. Mótanefnd KSÍ skal kappkosta að ljúka móti innan þess tíma sem niðurröðun gerði ráð fyrir við upphaf móts. Takist ekki að ljúka móti á þeim tíma sem niðurröðun gerði ráð fyrir við upphaf móts, er mótanefnd heimilt að framlengja mótið ef umtalsverðar líkur eru á, að mati mótanefndar KSÍ, að hægt sé að ljúka viðkomandi móti.
- 4.2. Mótanefnd er heimilt, að teknu tilliti til vallaraðstæðna og birtuskilyrða, að ákveða að tilteknir leikir fari fram á hlutlausum velli.
- 4.3. Mótanefnd er heimilt að flytja leiki í bikarkeppni aftur fyrir lokadag Íslandsmóts. Lokadagur til að ljúka bikarkeppni skal vera 1. desember 2021.
- 4.4. Öllum leikjum í Íslandsmótum skal vera lokið eigi síður en 1. desember 2021 og verður einstökum leikjum eða mótum meistaraflokka ekki frestað aftur fyrir þann tíma.

#### 5. gr.

##### *Úrslit ólokans móts. Móti aflýst.*

- 5.1. Ef sýnt þykir að ekki er unnt að ljúka Íslandsmótinu í knattspyrnu karla og kvenna samkvæmt mótaskrá vegna Covid-19 getur mótanefnd í samráði við stjórn KSÍ aflýst móti í öllum deildum eða einstaka deildum. Skal þá eftirfarandi gilda:
  - 5.1.1.: *Meistaraflokkur karla:* Hafi að lágmarki 2/3 hlutar heildarleikja í efstu deild, 1. deild, 2. deild og 3. deild verið leiknir samkvæmt mótaskrá ræður meðalfjöldi stiga **og markahlutfall** hvers liðs fyrir sig í hverjum leik sem það hefur lokið á þeim degi þegar móti er aflýst, endanlegri niðurröðun. Telst Íslandsmótinu þar með lokið. Skulu þá Íslandsmeistarar krýndir í hverri deild og lið færast á milli deilda með sama hætti og ef allir leikir í þessum deildum á Íslandsmóti hefðu verið leiknir.
  - 5.1.2.: *Meistaraflokkur kvenna:* Hafi að lágmarki 2/3 hlutar heildarleikja í efstu deild, 1. deild og 2. deild verið leiknir samkvæmt mótaskrá ræður meðalfjöldi stiga **og markahlutfall** hvers liðs fyrir sig í hverjum leik sem það hefur lokið á þeim degi þegar móti er aflýst, endanlegri niðurröðun. Telst Íslandsmótinu þar með lokið. Skulu þá Íslandsmeistarar krýndir og lið færast á milli deilda með sama hætti og ef allir leikir í öllum deildum á Íslandsmóti hefðu verið leiknir.
- 5.2. Ljúki aðeins einstaka deildir í Íslandsmóti karla eða kvenna, 2/3 hlutum leikja viðkomandi deildar samkvæmt mótaskrá, skal þó ávallt krýna Íslandsmeistara/**meistara** þeirrar deildar.
- 5.3. Takist ekki að ljúka Íslandsmótum karla og kvenna svo sem skilyrði í greinum 5.1.1. eða 5.1.2. kveða á um og jafnvel þó krýndir séu Íslandsmeistarar/**meistarar** í einni eða fleiri deildum, skv. grein 5.2. skulu engin lið færast milli deilda. Í því tilviki verður sama skipan liða í hverri deild við upphaf keppnistímabilsins 2022 og var keppnistímabilið 2021.
- ~~5.4. Í því tilviki að ekki verður mögulegt að ljúka keppni í einni eða tveimur deildum eða að ein eða tvær deildir nái ekki 2/3 hluta leikja þá mun stjórn KSÍ taka ákvörðun um hvernig fara skuli með skipan liða í þeirri deild og aðliggjandi deildum á næsta keppnistímabili.~~
- 5.5. Verði ekki unnt að ljúka úrslitakeppni 4. deildar karla, flyst ekkert lið upp í 3. deild og ekkert lið fellur úr henni.
- 5.6. Takist ekki að ljúka bikarkeppni skal ekkert lið krýnt bikarmeistari.

#### 6. gr.

##### *Þátttaka í Evrópukeppnum*

- 6.1. Í samræmi við reglur og ákvarðanir knattspyrnusambands Evrópu (UEFA) skal þátttaka liða í Evrópukeppni ársins 2022 ráðast af röð þeirra í efstu deild Íslandsmóts samkvæmt greinum 5.1.1. og 5.1.2.
- 6.2. Náist ekki að ljúka keppni í bikarkeppni karla, en Íslandsmóti lýkur samkvæmt grein 5.1.1. leikur liðið í 3. sæti efstu deildar Íslandsmóts í Evrópukeppni.

- 6.3. Verði ekki unnt að ljúka Íslandsmótum í efstu deild karla eða kvenna svo sem kveðið er á um í greinum 5.1.1. og 5.1.2. tekur stjórn KSÍ í samráði við UEFA ákvörðun um þátttökurétt liða í Evrópukeppni árið 2022.

7. gr.

*Sektir og brottvísun úr keppni*

- 7.1. Geti lið, sem uppfyllir skilyrði greinar 2.1., ekki uppfyllt skyldur sínar samkvæmt reglugerð KSÍ um knattspyrnumót skal hvorki beita sektum né öðrum viðurlögum.

8. gr.

*Önnur atvik*

- 8.1. Stjórn KSÍ hefur lokaákvörðun um öll þau málefni sem reglugerð þessi nær ekki sérstaklega til, m.a. með hliðsjón af reglugerð KSÍ um knattspyrnumót.

9. gr.

*Gildistaka og gildistími*

- 9.1. Reglugerð þessi er sett með stoð í 28., 33. og 44. gr. laga KSÍ og öðlast þegar gildi, sbr. 20. gr. þeirra laga.
- 9.2. Reglugerð þessi fellur úr gildi 31. desember 2021.

---

**Greinargerð/Samantekt:**

Reglugerð þessi var unnin af laga- og leikreglnanefnd KSÍ í framhaldi af tillögu frá mótanefnd KSÍ fyrir keppnistímabilið 2021. Reglugerðin er að mestu samhljóða reglugerð um sama efni sem var í gildi fyrir keppnistímabilið 2020. Var reglugerðin sett með það að markmiði að vera undirbúin fyrir hugsanleg skakkaföll vegna Covid-19 veirunnar en í reglugerðinni er fjallað um hvernig haga skuli mótum í því tilviki að ekki verði hægt að ljúka þeim á tilsettum tíma.


Markmið reglugerðarinnar er sem fyrr að félögum sé ljóst til hvaða aðgerða verði gripið ef ekki er hægt að ljúka mótum vegna Covid-19 veirunnar. Jafnframt er reglugerðinni ætlað að tryggja gegnsæi og fyrirsjáanleika í mótahaldi eins og kostur er.

Nokkur helstu atriði reglnanna eru eftirfarandi:

1. Reglurnar eru varúðarráðstöfun ef veruleg röskun verður á framkvæmd Íslandsmóts og bikarkeppni meistaraflokka vegna Covid-19.
2. Félög geta fengið frestun á leik eða leikjum ef:
  - I. Að minnst fimm leikmenn eru í fyrirskipaðri einangrun eða sóttkví.
  - II. Að viðkomandi leikmenn hafi verið í byrjunarliði í öðrum af síðustu tveimur leikjum liðsins.
3. Frestun á leikjum vegna framangreinds hefur augljós áhrif á röðun leikja, raskar leikjum í einstökum umferðum og leiðir til mismunandi álags á lið með mismunandi bili milli leikja.
4. Íslandsmeistarar í einstökum deildum verða ekki krýndir ef ekki tekst að leika 2/3 hluta leikja í viðkomandi deild.
5. Sé móti aflýst í meistaraflokki karla en 2/3 hluti heildarleikja í efstu deild, 1. deild, 2. deild og 3. deild hafa verið leiknir skv. mótaskrá þá ræður meðalfjöldi stiga og markahlutfall hvers liðs fyrir sig í hverjum leik sem það hefur lokið á þeim degi þegar móti er aflýst, endanlegri niðurröðun. Telst Íslandsmótinu þar með lokið. Skulu þá Íslandsmeistarar krýndir í hverri deild og lið færast á milli deilda með sama hætti og ef allir leikir í þessum deildum á Íslandsmóti hefðu verið leiknir. Takist ekki að ljúka 2/3 hluta heildarleikja í efstu deild, 1. deild, 2. deild og 3. deild í Íslandsmótum karla skulu engin lið færast milli deilda. Í því tilviki verður sama skipan liða í hverri deild við upphaf keppnistímabilsins 2022 og var keppnistímabilið 2021.

6. Sé móti aflýst í meistaraflokki kvenna en 2/3 hluti heildarleikja í efstu deild, 1. deild og 2. deild hafa verið leiknir skv. mótaskrá þá ræður meðalfjöldi stiga og markahlutfall hvers liðs fyrir sig í hverjum leik sem það hefur lokið á þeim degi þegar móti er aflýst, endanlegri niðurröðun. Telst Íslandsmótinu þar með lokið. Skulu þá Íslandsmeistarar krýndir í hverri deild og lið færast á milli deilda með sama hætti og ef allir leikir í þessum deildum á Íslandsmóti hefðu verið leiknir. Takist ekki að ljúka 2/3 hluta heildarleikja í efstu deild, 1. deild og 2. deild í Íslandsmótum kvenna skulu engin lið færast milli deilda. Í því tilviki verður sama skipan liða í hverri deild við upphaf keppnistímabilsins 2022 og var keppnistímabilið 2021.
  7. Verði ekki unnt að ljúka úrslitakeppni 4. deildar karla, flyst ekkert lið upp í 3. deild og ekkert lið fellur úr henni.
  8. Heimilt verður að lengja keppnistímabil ársins 2021 ef umtalsverðar líkur eru að ljúka megi keppni í einstökum deildum – þó aldrei lengur en til 1. desember.
- 

Ef frekari upplýsinga er óskað þá vinsamlegast hafið samband við undirritaðan.



Haukur Hinriksson,  
yfirlögfræðingur hjá KSÍ.